



盛京通志

第三冊
卷之三
典謨 碑頌贊文
卷之四
典謨 詩

ル 6
437
3



盛京通志卷之三

典謨

御製

三陵碑文

肇祖原皇帝碑文

粵稽書稱觀德詩咏發祥莫不由本支而遡厥初生祇
享假以垂夫來葉既隆報本之典亦昭受命之符洪惟
我

肇祖原皇帝暨

原皇后德合天地功配陰陽似后稷聿始周謨同帝嚳肇開

五
437
卷 3

唐業啟迪

列聖雄圖衍百禩家傳默祐冲人大統懋九圍帝業顧瞻

陵廟彌嚴祇敬之心鐫勒碑銘益篤靈承之慶卜年卜世光

華宣著千秋以祀以禋繼述遐昌奕代昭垂有永申錫

無疆

興祖直皇帝碑文

稽承家之遐慶遡開國之鴻圖積德累仁發祥有自肇

基垂統錫祉無疆洪惟我

興祖直皇帝暨

直皇后誕樹厥德聿宣乃武雖大勲未集而經綸已建當草

琳初開而謨烈允光令緒昭垂皇圖式啟迨予冲人承

茲丕緒蒞九土之率從合萬邦之愛戴

陵原重建洽篤祐之歡心

廟貌鼎新彰開天之盛烈永錫遐祚萬禩承庥

景祖翼皇帝碑文

粵稽祖德攸崇爰啟承家之緒宗功有永益隆篤祐之

思蓋追盛業以遡開天宜紀鴻勳以昭受命既彰發祥

之有自更申錫福之無疆洪惟我

景祖翼皇帝暨

翼皇后弘謨大烈厚澤深仁雖未集耆定之勲而不宣有象

實始建經綸之業而式廓用光令緒丕昭已見六州歸命皇圖肇造先占率土傾心

原廟重新弓劍衣冠皆起羹墻之慕

山陵永奠子孫臣庶咸蒙佑啟之仁爰勒豐功作本支之百世載揚休烈錫嘉祉於千秋繼述遐昌昭垂丕替

顯祖宣皇帝碑文

蓋惟天肇一代之運必著開先啟後之勲聖垂百世之模必有積德累仁之實丕基方建締造惟勤大業式弘駿鴻宜勒用申報本之典益彰受命之符洪惟我

顯祖宣皇帝暨

宣皇后文謨丕顯武烈載揚星流華渚已乘赤日之祥電繞

辰樞更兆神龍之瑞雖皇猷肇啟大勲未遍於寰區而帝緒昭垂聖德實留乎奕禩橋山載闢百千載無斁明

禋

原廟重新億萬年用鐫令烈承庥有永佑祚無疆

福陵神功聖德碑文

惟

天眷佑下民綏靖方域篤生我

皇曾祖太祖高皇帝肇興東土奮師一旅式闢皇圖大武布昭深仁洋溢用造我國家萬億年丕丕基駿德鴻功於

燦顯懿駕軼亘古予小子纂承洪緒既奉冊寶崇上尊諡載緝徽猷炳垂方策惟

陵寢宜有功德之碑敬述大略永勒貞珉敘曰

太祖承天廣運聖德神功肇紀立極仁孝睿武弘文定業高皇帝姓愛新覺羅氏諱

先世發祥長白山之陽禎符神貺歷著休徵至

皇始祖肇祖原皇帝式廓舊業寢熾寢昌又五傳至

顯祖宣皇帝世濟其勤流長積厚景運懋集神器攸歸誕啟我

太祖高皇帝

顯祖之長子也

宣皇后娠十有三月乃生龍顏鳳目豐頤大耳天表玉立舉

止非常少不飲酒嬉戲稱為聰明貝勒及長騎射絕倫

雄略蓋世用兵無敵而又至誠御物大度容人先是有

望氣者言滿洲將生聖人統一諸國至是滿洲長白山

及東海扈倫諸部落爭相雄長癸未春蘇克蘇濟河部

圖倫城有尼堪外蘭者陰搆明軍首逞大難於我時

太祖皇帝二十有五泣血誓師枕干問罪以遺甲十三副攻

尼堪外蘭克圖倫城復攻之於甲板誅諾米訥奈哈達

取撒爾湖城時異已猜忌包藏禍心伺間竊發天威所

懾罔弗獸驚鳥散遂俘兆佳城長李岱取馬兒墩平定董鄂哲陳渾河等部丙戌秋擒斬尼堪外蘭於鵝爾渾城戎首服辜先聲震疊環境諸國相繼削平旣而葉赫哈達吳喇輝發科爾沁國席北卦爾察朱舍里納殷路九姓之國合兵三萬八分道來侵偵者夜告

太祖皇帝安寢達旦蓐食濟師殲其渠首餘部皆潰斬級四千獲馬三千匹鎧甲千副羣方讐服乃增築城墉脩飭法制創製國書開金銀鐵冶所產蠟珠織皮通厥貿易財用殷阜肇立軍制師律精嚴國勢日盛丙午冬蒙古五部落酋

太祖爲神武皇帝歲時朝貢絡繹相望而哈達輝發吳喇數渝盟先後征討悉定其地每當軍行輒見五色雲亘天祥光四塞立奏鉅功遠邇翕服益四旗爲八設固山梅勒甲喇牛朵額真遞相統轄命佐領下各出牛種屯田積穀貯倉置理政聽訟大臣緩刑慎獄野無剽竊路鮮拾遺國中大治帝業已成貝勒大臣集議勸進丙辰春正月恭上

尊號曰覆育列國英明皇帝建元天命時年五十有八越二年定策征明明政久弛棄絕和好援我仇讐蕩搖我邊陲於是誓告有衆類

帝禡旗而行遂入撫順降臺堡五百所繼下清河明大舉稱
兵會於瀋陽號四十七萬張左右翼左翼以杜松王宣
趙夢麟張銓由渾河出撫順關馬林麻巖潘宗顏由開
原合葉赫兵出三岔口右翼以李如栢賀世賢閻鳴泰
由清河出鴉鶻關劉綎康應乾合朝鮮兵出寬奠口向
董鄂四路來侵

太祖皇帝分精騎奮擊大破其衆五口而悉殲之城界凡取
開原破鐵嶺滅葉赫五年克遼陽瀋陽定議建都始築
東京尋取廣寧拔撫順十年遷都瀋陽由是東漸海西
訖遼南及朝鮮北暨嫩烏龍江以至使犬諾落諸路罔

不臣服

太祖皇帝神武天錫決幾制勝變化若神每戰輒單騎深入
裹劍斬馘神色不動善駕馭材雄推心置腹撫納降附
棄捐忿隙恒予擢用法所當坐雖親昵罔所私攻拔城
邑嚴禁軍士安輯居民是以羣策競奮率士思歸御極
以後拓地開疆日不暇給而躬勤於聽覽留神於載籍
修德納諫親賢遠奸建二本於門俾下情欲達者書之
以進尚寬大崇節儉睦宗親厚風俗重農桑賑窮乏垂
示典訓蕩平正直允爲萬世法程猗歟盛哉天命十一
年八月庚戌崩

聖壽六十有八在位十有一年天聰三年二月己亥葬
福陵天柱山崇德元年四月上

尊諡承天廣運聖德神功肇紀立極仁孝武皇帝廟號

太祖康熙元年四月加上

今諡嗚呼有明德衰海寓板蕩之時生民顛隕之會我

太祖皇帝應運蹶生手提天戈披榛辟萊櫛風沐雨掃邊陲

如破竹定遼左若建瓴戡亂求寧非富天下功極於配

天道隆於昌後歷稽曩代創業垂統之君未有邁此締造憂

勤經綸宏遠者也瞻赫濯之如新撫承平之永賴歌思

光烈曷罄名言謹拜手稽首而作頌曰

天造大邦勃興東極長白山高苞符開闢亂鳥生商履武誦

稷奕葉炳靈肇基王迹

太祖龍飛旋乾轉坤齊徽炎昊比烈羲軒時惟草昧陟巘降

原一成奮起雷動雲屯蠹爾仇方敢作牙蘖赫斯一怒

恭行天伐寢甲枕鞍神勇迅發巨憝授首戎心式遏奇

謀倜儻遠略深沉內構者挫外訏者禽單師十百摧破

強鄰九邦潰糜四路掃塵攜貳則誅歸誠則撫義問宣

昭仁恩施普大畏小懷實揚我武來庭來王日闢疆土

疆土既闢歷數在躬膺圖受籙響應景從三才協軌百

靈潛通指麾盪滌振落發蒙覘敵烏集濟師水泮夾日

貫月卿雲糾縵不義是征功成惟斷乘越稱干

帝心厭亂環山負海風靡雲披朱旗疾捲汗馬爭馳後我思
恂歌舞迎師紀元頒朔建策開基爰定軍營森羅鵠鶴
步伐止齊井牧相圩爰建國都屹峙屏翰扼吭拊背皇
居攸煥爰命分職勗哉臣鄰爰慎折獄恤哉祥刑爰達
民隱輶鐸重陳爰製國書科斗更新訏謨孔彰風規渾
噩禹誓湯征千秋繼作聲靈覃敷東西南朔大統乃膺
新命迺廓既詒既翼如鎬如豐九圍是式萬國來同卜
年卜世惟

太祖功巍巍蕩蕩昭格

蒼穹右享郊壇敷時思繹炳耀圖書輝煌球璧景瞻

福陵神丘是宅百川縈朝羣山拱掖葱龍王氣松楸鬱蒼王
衣永鎮弓劍長藏億載顧慕春露秋霜樹茲穹碑錫嘏
無疆

昭陵神功聖德碑文

天以神器畀我國家洪惟

皇祖太宗文皇帝智勇神聖光昭

太祖高皇帝丕緒帝紘皇綱是廓是恢榦不庭方構造鴻業
垂裕

皇考世祖章皇帝大一統之基貽億萬禩無疆之休維予小

子纘承

聖緒念

陵寢宜有功德之碑敬勒貞珉昭示無極敘曰

太宗應天興國弘德彰武寬溫仁聖睿孝隆道顯功文

皇帝

太祖承天廣運聖德神功肇紀立極仁孝睿武弘文定業高

皇帝第八子也

母孝慈昭憲敬順慶顯承天輔聖高皇后生而神靈徇齊明

敏龍行虎步顏如渥丹嚴寒不栗舉止非常

太祖皇帝特鍾愛焉既長英武豁達孝弟恭敬慈愛和順

心寬弘好觀書史一有聞見終身不忘沉幾果斷羣望

攸屬天命十一年八月

太祖皇帝升遐諸貝勒大臣咸推我

皇祖才德冠世宜纘承帝業以九月朔嗣登大位建元天聰

時年三十五踐祚之後愛養人民撫綏中外崇儉務本

修政任賢仁聲義聞無遠弗届除慝討貳用整六師迺

擊蒙古執一十四貝勒奏凱八纛下迺征朝鮮克義州

進拔漢山城入安州抵平壤朝鮮王李倬遁江華島遣

其弟覺來行成遂盡反所收地與盟而還迺征察哈爾

剪多羅特部落編俘獲爲氓迺伐明自遵化臨北京略

良鄉斬其將滿桂孫祖壽擒其將黑雲龍麻登雲還拔
永平廼拔大凌河降其將士於是孔有德耿仲明等航
海來歸廼征黑龍江瓦爾哈下之察哈爾舉國來附獲
歷代帝王傳國之寶天聰九年冬羣臣勸進

尊號

皇祖辭讓再三明年四月表上

尊號曰寬溫仁聖皇帝建國號大清改元崇德告於

皇天后土追王

列祖上

太祖高皇帝

高皇后尊謚羣臣咸上表賀乃錫宴肆赦是年朝鮮毀盟討
之拔其都載飛舸於車凌江華島李侖自縛請為臣釋
水師渡海克皮島既而大出師遣將毀關入分左右翼
由涿州略地至山西界復自臨清渡河破濟南克城四
十有九降者八與明兵五十七戰皆捷六年圍錦州入
其郭洪承疇以兵來援

皇祖陳師於松山杏山之間明兵號十三萬望見

皇祖張黃蓋往來指揮皆懼謀夜遁我師分道急擊連大破
之擒承疇降祖大壽錦州松山杏山塔山悉下又命將

入關破兗州東抵寧海克城八十有八降者六陣敗明
兵者三十九於是天戈所指罔不率俾黃河之源青海
之濱使犬役鹿之國來賓恐後野駝奇獸黑狐紫貂重
譯來獻聲教之遠功烈之盛古未有也嗚呼維我

皇祖

克配天心誕膺景命聰明睿知神武不殺懷柔以德燮
伐以威大勲用集大猷是程無有內外乃罔不卽敘親
九族正百官修明典章誕敷政教隆郊丘廟祀之儀定
頒曆朝會之禮辨鹵簿旗章服御之制聲明文物炳然
弘備擇奠孔子以四子配立文館譯書史於翔鳳閣俾
儒臣記注得失開科目取士

論臣

下盡言無隱論功封兄弟子姪爲諸王貝勒外蒙古
亦論功封爵有差優禮降臣寄以心膂賞罰詳明獄
平允綱舉目張仁至義盡至於審制度定律令斥邪術
禁喪祭踰禮者務農桑廣漁獵以豐民食皆可爲萬世
法凡勤勞國事者賜予必優渥召近臣入宮日至再三
講論政事以賓禮遇之諸國新附之人入見必詢其姓
名世系慰勞如舊識

天語

藹然以故雖至難馴者無不悅服如薩哈爾察卦爾察
瓦爾喀虎爾哈諸國素不習禮法亦貢獻稱臣其貝勒
大臣至俱恩遇之如子弟故其部落降者相繼嘗念中

原生民塗炭欲與明和好惟務修德不樂觀兵屢貽書
明邊帥曰朕意在講和不忍無辜赤子慘罹鋒鏑明之
君臣置若罔聞致煩

天討然每出師必

諭諸將授以兵律嘗曰明之土地人民

天以與我是民卽我民也故師行雖嚴寒不入屯堡士卒死
傷弔問不遺每戰勝攻取符瑞駢集必曰

上天眷佑惕然祇懼克敵告於

廟蓋敬

天尊

祖勤民若是其至

豐功厚澤與天地同久大有國史所不能盡書者矣以崇德

八年八月庚午崩

聖壽五十有二在位十有七年九月壬子葬

昭陵隆業山嗚呼八音遏密萬國感痛實惟

至德深仁爲生民主以弘我國家之大寶命愾憊見聞陟降
庭止謹述盛概拜首稽首而系之以頌曰於赫

皇祖纘

太祖之緒誕敷乃文孔奮厥武整我師干拓我疆土東奠朝
鮮西讐蒙古貳則獲之服則釋之降則憐之賢則臣之

有言遜志則必遏之有言逆耳則必納之治分六曹職
統三院筆簪史臣書譯文館與神爲謀以古爲鑑制禮
明刑儀章是憲一人有慶肇域四方四方來王自天降
祥和鸞鏘鏘旗旒央央聿昭茂祉焯燿章光乾符效珍
坤儀開奧旣協靈圖誕升顯號濟濟師師羣工舞蹈曆
數攸歸謳歌前導乃禋乃祀於

廟於

郊乃燕乃射於野於朝乃赦乃宥於狩於祭乃獵於狩
於苗乃命紫宮清寧正中麟趾在右關雎在東崇政篤
恭翔鳳飛龍文德武功以綏萬邦松山之陰杏山之下

戰士連營崇墉百堵取彼元戎繫之以組肅將

天威救民水火屹屹榆關王旅所經而幽而并而冀而青而
兗而徐克其百城涉河踰濟及於東溟時乘以乾帝出
乎震罔有遐邇民莫不信或獻其琛或輸其賚河源海
塙協靈效順有典有則貽萬子孫言爲丘墳績媿農軒
佑我

皇考大啟幅員允

皇祖之德

皇祖之勲瞻仰

昭陵在盛京之北雲霞所棲松栢所植有穹者碑昭宣世德

第祿來崇時萬時億

御製廟碑

興京顯祐宮碑文

自古帝王統御天下必以仁義為本尤懋恭肅而崇祀明神蓋期國祚熙昌俾兆民罔不康寧之故欽惟神莫大於

昊天而事莫隆於開創虔恪之志益當加倍尋常惟茲

興京所建

顯祐宮始於締造之初昭事

上帝之所其關甚重運祚靈長神實啟之臣民瞻仰神實迪

之是以國家膺圖御錄固我

太祖武皇帝

太祖文皇帝開駿業而肇鴻基本仁義而施政教所致然荷

茲

天眷者豈非誠敬萬靈懷柔河嶽之故歟是以

天無所不在事

天之心即無時不謹稽王業所自始地擅神臯邈

祖德所潛通歆居

上帝朕夙夜寅恭冀登土理瞻念受命發祥之地益深欽

天率

祖之思已命所司繕整惟新春秋禋祀載表功德樹豐碑以傳不朽於戲艱難不昧常懷對越之誠丹雘丕章永保岡陵之固後之子孫臣庶其無忘朕敬事之意焉

盛京景祐宮碑文

自古帝王之興莫不首隆祀典凡有功德於民者皆爲建壇宇而通盼嚮蓋神旣佑民以福國則國必崇祀以報神此廟貌之所由隆也我

太祖

太宗手定大業拯斯民於塗炭膺景祚之綿長雖積功累仁所致而百神之靈實式憑之

大清門東三官廟尤神最顯赫而及民功德爲最著者考之道書三官廟之神有天地水府之別國家當干戈擾攘之際急圖康阜使時和年豐室廬相慶則天官賜福主之其或貫索未空金氣猶沴使斯民秉德格非遠刑罰而登仁壽則地官赦罪主之又或大軍之致凶年大荒之致奇疫滌其毒災而消其害氣則水官解厄主之然則使民富使民樂利使民康寧而因以默佑我邦家孰非神之賜也歟嗚呼發祥重地永藉呵護之靈凡我生民咸蒙乂安之福爰命勒石用表神功以垂不朽云

平定朔漠告成太學碑

惟

天盡所覆海內外日月所出入之區悉以畀予一人自踐阼
今蚤夜殫思休養生息冀臻熙皞以克副維皇大德好
生之意庶幾疆域無事得以偃兵息民迺厄魯特噶爾
丹阻險北陲困此一方人旣荼毒塞外輒狡焉肆其兇
逆犯我邊鄙虐我臣服人用弗寧夫蕩寇所以息民攘
外所以安內邊寇不除則吾民不安此神人所共憤天
討所必加豈憚一人之勞弗貽天下之逸於是斷自朕
心躬臨朔漠欲使悔而革心故每許以不殺彼怙終不
悛我師三出絕塞朕皆親御以行深入不毛屢涉寒暑

勞苦艱難與偏裨士卒共之迨彼狂授首脅從歸誠荒
外若長來享闕下西北萬里灌燧銷烽中外又謐惟朕
不得已用兵以安民旣告厥成事迺蠲釋告災潔事禋
望爲億兆祈昇平之福而廷臣請紀功太學垂示來茲
朕勞心於邦本嘗欲以文德化成天下顧茲武畧廷臣
僉謂所以建威消萌宜昭斯績於有永也朕不獲辭攷
之禮王制有曰天子將出征受成於學出征執有罪反
釋奠於學以訊馘告而泮宮之詩亦曰矯矯虎臣在泮
獻馘又禮王師大獻則奏愷樂大司樂掌其事則是古
者文事武事爲一折衝之用具在樽俎之間故受成獻

馘一歸於學此文武之盛制也朕嚮意於三代故斯舉也出則告於神祇歸而遣祀闕里茲允廷臣之請猶禮先師以告克之遺意而於六經之旨爲相符合也爰取思樂泮水之義爲詩以銘之以見取亂侮亡之師在朕有不得已而用之之實或者不戾於古帝王伐罪安民之意云爾銘曰巍巍先聖萬世之師敬信愛人治平所基煌煌聖言文武道一禮樂征伐自天子出朕臨域中逾茲三紀嘗見羹墻寤寐永矢下念民瘼上承帝謂四海無外盡隸侯尉維彼克醜瀆亂典常旣梗聲教遂窺我疆譬之於農患在螟螣秉畀不施將害稼穡度彼游魂險遠是怙震以德威可往而取朕志先定龜筮其依屬車萬乘建以龍旗祝融驂鸞風伯戒途宜暘而暘利我樵蘇大野水澗川瀆効靈泉忽自涌其甘如醴設爲犄角一出其西一出其東中自將之絕域無人獸羣自掩五日窮追彼狂走險大殲於路波血其孥剪其黨孽俘彼卒徒衆鳥晝號單馬宵遁恐久駐師重爲民困慎固戍守還轅於京自夏徂冬雨雪其零載馳載驅我行至再蠢茲窮寇昏惑不悔我邊我氓以休以助爰寧其居爰復其賦藩落老稚斯恬斯嬉歲晏來歸春與之期春風飄翮揚我旆旂我今於邁如涉我郊言秣我馬狼

居胥山登高以眺閔彼彈丸天降克罰孤雛就羈三駕
三捷封狼輿尸旣腊梟獍旣獮豺豕大漠西北解甲棄
爰振旅凱入澤霈郊卜明禋肆赦用迓景福昔我往矣
在泮飲酒陳師鞠旅誓屈羣醜今我來思在泮獻功有
赫頌聲文軌來同採芹採藻頌興東魯車攻馬同亦鐫
石鼓師在安民出非得已古人有作昭示斯旨緬維虞
廷誕敷文德聖如先師戰慎必克惟兵宜戢惟德乃綏
億萬斯年視此銘詞

北鎮廟碑

康熙四十七年

醫巫閭屹峙東北爲幽州巨鎮昔虞帝封十有二山此
其一也穹崇磅礴靈瑞所鍾實護王氣以壯鴻圖嶽嶽
瀆諸神並垂祀典朕省方問俗嘗過其境望其佳氣鬱
鬱葱葱上插霄漢下瞰蓬瀛懸瀑飛流喬松盤蔚知其
所以保障而迎休者蓋有素矣向錫匾額式展褒崇而
廟貌未隆無以昭顯特勅修造遣專官以恪乃事凡所
需給皆頒自內府始於康熙四十五年七月訖於本年
十一月不四月而告厥成工焉規制宏備輪奐維新紺
宇琳宮照耀山谷於時臣民瞻仰罔不欣悅而府尹臣
奏請謂宜光文翰勒諸貞珉朕御極以來勤恤民隱祇
奉

天庥敬共神明罔敢稍斁維北鎮之奕奕爲神京之翊輔嘉符凝集靈爽式憑神其永贊雍熙益弘福祐錫蕃昌於庶類固丕祚於萬年用慰朕精虔之至意爰樹穹碑書重修歲月以示來茲

平定青海告成太學碑 雍正三年

我國家受

天眷命撫臨八極日月所照罔不臣順遐邇又安兆人蒙福乃有羅卜藏丹津者其先世固始汗自國初稽首歸命當時使臣建議畀以駐牧之地其居雜番羗密近甘涼我

皇考聖祖仁皇帝睿慮深遠每厪於懷旣

親御六師平定朔漠威靈所加青海部落札什巴圖兒等震

讐承命

聖祖仁皇帝因沛殊恩封爲親王兄弟八人咸賜爵祿羈縻包容示以寬大而狼心梟性不可以德義化三十年來包藏異志朕紹登寶位優之錫賚榮其封號尚冀革心輯寧部衆而羅卜藏丹津昏謬狂悖同黨吹拉克諾木齊阿爾布坦溫布藏巴禮布等實爲元惡謂國家方弘浩蕩之恩不設嚴密之備誕敢首造逆謀迫脅番羗侵犯邊城反狀彰露用不可釋於天誅遂命川陝總督太

保公年羹堯爲撫遠大將軍聲罪致討以雍正元年十月師始出塞自冬涉春屢破其衆凡同叛之部落戈鋌所指應時摧敗招降數十萬衆又降其貝勒貝子公台吉等二十餘人朕猶憫其蠢愚若悔禍思愆束手來歸尚可全宥而怙惡不悛負險抗違乃決翦滅之計以方畧密付大將軍羹堯調度軍謀簡稽將士用四川提督岳鍾琪爲奮威將軍於仲春初旬禡牙徂征分道深入搗其窟穴電掃風驅搜剔巖阻賊徒蒼黃糜潰窮蹙失據羅卜藏丹津之死及逆謀渠魁悉就俘執擒獲賊衆累萬牲畜軍械不可數計賊首逃遁我師踰險窮追獲其輜重人口殆盡羅卜藏丹津子身易服竄匿荒山殘喘待斃自二月八日至二十有二日僅旬有五口軍士無久役之勞內地無轉輸之費克奏膚功永清西徼三月之朔奏凱旋旅饒鼓喧轟士衆訢喜四月十有二日以倡逆之吹拉克諾木齊等三人獻俘

廟

社受俘之日臣民稱慶伏念

聖祖仁皇帝威靈震於遐方福慶流於奕葉用克張皇六師殄滅狂賊行間將士亦由感激

湛恩厚澤爲朕踴躍用命斯役也芟夷凶悖綏靖番羌俾烽

燧永息中外人民胥享安阜實成

先志以懋有不績廷臣上言稽古典禮出征而受成於學所以定兵謀也獻馘而釋奠於學所以告凱捷也宜刊諸珉石揭於太學用昭示於無極遂爲之銘曰

天有雷霆聖作弧矢輔仁而行威遠寧邇維比青海種類實繁錫之茅土列在藩垣被我寵光位崇祿富負其阻遐禍心潛構恭惟

聖祖慮遠智周瞻念荒服綏撫懷柔朔野旣清西陲攸震爵號游加示之恩信如何兇狡造謀逆天鼓動昏黷寇侵於邊惟彼有罪自干天罰桓桓虎貔爰張九伐王師旣

路冬雪初零日耀組練雷響鼙鉦蠢茲不順敢逆戎旅奮張螳臂以當齊斧止如山獄疾如雨風我戰則克賊壘其空彼昏終迷曾不悔戾當剪而滅斯焉決計厲兵簡將往擣其巢踰歷嶽嶇坦若坳郊賊棄其家我繫而獲牛馬谷量器仗山積蹇兔失窟何所逋逃枯魚遊釜假息煎熬師以順動神明所福旬日凱歸不疾而速殪彼逆謀懸首藁街獻俘成禮金鼓調諧西域所瞻此惟雄特天討旣申羣酋惕息橐戈偃革告成辟雍聲教遐暨萬國來同惟我

聖祖親平大漠魏功煥文邁桓軼酌流光悠久視此銘辭繼

志述事念茲在茲

重修北鎮廟碑 雍正五年

國家敬共明神虔修秩望嶽鎮海瀆之祀罔不祇肅暨
巫閭山實為北鎮近接興京翊衛關輔曩者

皇考御書匾額以展褒崇復遺官修飭廟貌

御製碑文光昭奕代典至盛矣康熙五十九年朕奉

皇考命恭謁

祖陵於興京道經山麓躬詣展禮瞻仰祠廟蠲潔致禱因崩
資庀工載加整葺嗣是雨暘時若禾黍有秋遼左黎元
咸沾嘉貺洎朕臨御之初復遣專官董司營治棟宇棧

榜丹雘一新雍正四年冬厥功告成朕惟茲山表自虞
書載在周禮蓋自天地開闢以來靈秀之所萃聚越數
千年神應彰顯而我

祖

宗發祥關左豐岐重地王氣所鍾惟神實為擁護永奠鴻

基靈蹟頻昭朕懷允愜敬共之念夙夜加虔神其弘敷
蕃祉益顯豐功俾方輿之內四序順成百嘉屯遂風雨
慶其調和民物樂其康阜洪禧默贊歲事豐穰慰兆庶
依庇之心以稱朕愛育羣生肅奉靈祇之意式鑄瑰琰
用昭示於億萬斯年

御賜諸臣墓碑

莊親王舒爾哈齊碑 順治十一年

惟國家褒顯宗英推崇皇族生頒榮秩歿予追封所以篤本支昭親愛也爾達爾漢把都魯舒爾哈齊乃

太祖高皇帝胞弟朕之叔祖系序既尊天潢孔切更生賢允克奏膚功宜用追崇以彰旻德茲特加封爾為莊親王列在藩屏聿展貽孫之義光施泉壤允敷敦族之仁勳諸貞珉永垂不朽

弘毅公額宜都碑 順治十一年

帝王得人共圖大業治定之日必昭其功於天下後世以志不忘我

祖宗創造艱難一時鷹揚之佐邁合風雲號稱濟濟成蹟具在藏於冊府額宜都者奮跡戎行戰功久著從征哈達兀喇葉黑暨攻土崙襲色格界率衆先登敵無堅壁至取巴爾岱城奮軀登堞矢貫其身連於堞上以刀斷之猶能入城其鷙猛有過人者少年歸命身經百戰屢被重創遍體瘡痍如收黑舍黑虎兒哈狎賴諸部又能以少擊衆俘獲甚多開拓疆土厥績懋焉

太祖嘉與勲庸賜以婚媾及其歿也

先皇復加追敘高爵崇祀軫恤甚備國有若臣可謂忠勇忘身有始有卒者矣用勒貞石以示表章歲月逾遠嘉績

彌彰於以褒勸有功庶幾宣力國家者聞之而有感焉

忠義公圖爾格碑 順治十一年

國家肇造鴻業櫛風沐雨宣力効忠繫虎臣是賴故生勤寵錫歿與表揚公侯干城渥以典禮所以傳其豐功偉績至久而不衰也故忠義公圖爾格義勇無敵忠蓋不渝曩從

太祖屢著戰功翼佐

太宗戰山左扼關門逐錦杏身被重創灑血疾趨惟爾庸特下青齊克名城殲渠魁先登後殿力保

御幄惟爾庸方期爾共享太平股肱是寄而爾早侍

皇考於九天矣朕惟追憶前勞悼念無已雖恩卹屢加朕心

猶歉特諭禮臣請勒石銘勲昭垂百世於戲忠貞世篤賞延於後其所謂文武爲憲者耶爾英爽昭著服茲寵休垂示後人庶識朕報功之典永永罔替云

果壯公超合羅碑 順治十四年

朕惟國家開創大業心有英賢佐命建立鴻勲生固顯秩崇階振威德於天下歿亦榮名美謚傳盛烈於後世此錄故舊之深恩勸忠臣之巨典也緬惟我

太祖

太宗時舊臣推誠宣力矢志服勤貞心亮節屹然不磨朕豈

能已於追念也哉爾超合羅原係燾章京任禮兵一部侍郎以辦事有能授拜他喇布勒哈番後往董家口送諭帖遇敵哨兵殺之二次征明都城時擊敗敵哨生擒蒙古二人都城北遇敵兵及蘆溝橋步兵領擺牙喇燾擊敗之初次過明都城往征山東時遇馮太監兵率本甲喇兵擊敗之指揮攻兄任邱縣趙北口守河橋步兵領本固山兵步戰擊敗之又遇赫總鎮兵率甲喇兵步戰擊敗之出邊之時遇太平寨馬步兵遵指揮擊敗之爾乃能益勵忠誠封疆依賴及三次圍錦州時城內兵出戰在關廟爾遇敵衝鋒捐軀報國可謂始終盡瘁者矣今追述往事軫念前勲効力致勇死於原野諡曰果壯以垂不朽特命勒諸貞珉光及泉壤用昭朕故舊不遺之至意云爾

端壯公納爾恰碑 順治十四年

朕惟國家開創大業必有英賢佐命建立鴻勳生固顯秩崇階振威德於天下歿亦榮名美謚傳盛烈於後昆此錄故舊之深恩勸忠臣之巨典也緬惟我

太祖

太宗時舊臣推誠宣力矢志服勤貞心亮節屹然不磨朕豈能已於追念也哉爾納爾恰原係拜他拉布勒哈番因

攻伊漢納林城先登取之後征明時進三等阿達哈哈
番爾乃能益勵忠誠封疆攸賴同十六員章京効力行
間勤勞茂著後攻沙陵城時爾禦敵衝鋒捐軀報國可
謂始終盡瘁者矣今追述往事軫念前勲守禮執義死
於原野諡曰端壯以垂不朽特命勒諸貞珉光及泉壤
用昭朕故舊不遺之至意云爾

僖順公廟拜碑

順治十四年

朕惟國家開創大業必有英賢佐命建立鴻勲生固顯
秩崇階振威德於天下歿亦榮名美諡傳盛烈於後昆
此錄故舊之深恩勸忠臣之巨典緬惟我

太祖

太宗時舊臣推誠宣力矢志服勤貞心亮節屹然不磨朕豈
能已於追念也哉爾霸拜原係蒙古夸兒夸貝子能識
時運倡率部屬首先投順因以格格配下授三等精奇
呢哈番爾能益勵忠誠稱乃厥職今追述往事軫念前
徽小心恭慎和比於理諡曰僖順以垂不朽特命勒諸
貞珉光及泉壤用昭朕故舊不遺之至意云爾

精奇呢哈番回山額真佟養性碑

順治十四年

稽古建業驅策羣力不吝爵賞以勸有功昭示於後用
傳不朽所以勵忠蓋甚備也爾佟養性原係明撫順城

人能識時運誠心來歸故賜女爲婿授爲三等阿思哈
哈番克遼東後陞爲二等精奇尼哈番爾能益勵忠誠
稱乃厥職爲烏金超哈固山額真率領砲鳥鎗効有勤
勞是真始終盡瘁克襄王室者矣今追述往事軫念前
勲特命勒諸貞珉光及泉壤國典臣忠庶幾昭垂母敦
哉

直義公蜚英東碑

順治十六年

國家締造鴻圖獎于勞勩厥有常典至隆備也况始事
之臣櫛沐風雨功載盟府爲國無窮者乎爾蜚英東忠
亦有謀沉雄善斷當

太祖武皇帝時首先歸命漸陟崇班始力擒兌秦把彥兩征

拂內黑地方度取撫順皆能奮勇先進出奇制勝額奇
克貝勒矯制移城爾獨能抗直不回大義凜凜攻葉黑
志在必克進無返顧卒下其城前後數十載勳勩大業
還暢天威摧陷之勲實多意賴雖積勞殞身休烈未泯
先皇受命之初追念厥功特崇顯爵配享

廟庭而表章尚闕因樹茲貞石昭示將來生建壯猷歿膺寵
卹榮哀有赫式慰永懷庶使宣力國家者聞之有感云
忠直公宜爾登碑 康熙六年

稽古建業驅策羣力不吝爵賞以勸有功故生勤寵錫

歿與表揚干城腹心有傳不朽所以勵忠蓋甚備也爾
二等伯內大臣加一級宜爾登賦姿義勇制行忠直蚤
莅戎行才猷素著其征北京圍錦州等處或越衆先人
或設伏出奇以少勝衆屢敗敵兵克副任使優獎膚功
歷事累朝公忠允懋於其歿也朕深悼焉特賜諡曰忠
直勒諸貞珉光及泉壤國典臣誼庶其昭垂無斁哉

多羅勇壯貝勒穆爾哈齊碑 康熙十年

自古帝王承天撫世篤念宗親故生則賜以榮封歿則
彰以分譽典最渥也爾清巴圖魯穆爾哈齊係

宣皇帝之子秉性安詳居心愷悌已追封爲多羅勇壯貝勒

薨逝既久豐碑未樹朕念切本支復隆表著之恩爰稽
成憲勒之貞珉用傳不朽庶昭朕敦族之心永爲藩屏
之懿典云爾

剛毅輔國公大爾差碑 康熙十年

自古帝王創業垂統以昭萬世凡屬宗支皆膺顯號以
重懿親也爾大爾差係諡勇壯清巴圖魯穆爾哈齊之
子性行純良才猷敏練已封爲剛毅輔國公奄逝既久
豐碑未樹朕篤念宗親爰稽成憲勒之貞珉用垂不朽
庶昭朕敦睦之懷云爾

文端公車克碑 康熙十年

稽古興朝必有賢能之臣生則榮以高爵歿亦錫以豐碑所以勵忠益甚備也爾車克性行端良才能稱職部務歷膺副簡任之意綸扉參贊建調燮之能久襄王事茂著勤勞忽聞長逝甚悼朕懷特賜諡曰文端勒諸貞珉光及泉壤國典臣忠庶其昭垂無斁哉

頴親王薩哈廉碑

康熙十一年

自古帝王創業垂統必懋建本支以作藩屏故生隆顯爵歿錫豐碑親親賢賢典甚重也爾薩哈廉貝勒負姿忠亮中外所推膚功屢建甲冑躬擐努力行間職司邦禮盡心典則益著寅清河百代所當瞻仰者也擬封多

羅郡王忽焉長逝

太宗文皇帝瞻爾勲勞追封爲和碩頴親王以示隆眷於康熙二年特賜卹典勅建豐碑朕今追念前徽加諡曰毅重勒貞珉用傳不朽以示敦睦懿親之意云爾

福建總督范承謨碑

康熙二十一年

朕惟朝廷簡畀重臣授以封疆之任平時則竭誠殫力以靖厥職猝逢事變則有凜乎不可犯確然不可奪之節舍生取義流光天壤古所謂不二心之臣如此而已爾范承謨名臣之子奮迹甲科入侍禁林出典節鉞咸有聲績著於當官泊聞疆蒞鎮之年值狂豎盜兵之日

寇起門庭禍生肘腋智未及施勇不暇展而爾志耻倖
生義無苟免奮身罵賊誓不共天遂致闔室幽囚三年
拘繫阻斂其衣食迫脅以甲兵亮燄彌張貞操愈勁卒
蹈白刃以作完人慷慨從容兼有其美茲者底定疆陲
申明命討罪人斯得臣節益昭倍深軫悼之情特厚飭
終之禮寵以隆秩諡曰忠貞嗚呼褒忠顯善帝王治世
之大權恩命疊頒朕曷有私於爾以培正氣以植人倫
庶使遐悞之士覩盛典而知興慕義之夫聞休風而加
勸勒諸貞石其永有譽於無窮哉

忠愍公佟國瑤碑

康熙三十年

朕惟順疆宗而任折衝爰賴忠勤之佐聽鼓鼙而思將
帥彌深存歿之懷鞠躬盡瘁以長徂報禮飭終之宜厚
聿稽彝憲用沛恩施爾終國瑤朝推望族家育良才早
承緒於勲臣恪恭濟美泊典戎於楚甸夙夜宣勞膺簡
命以建牙蒞閩疆而作鎮地兼山海寄重千城訓練有
方克謹師中之律韜鈴素具丕揚閩外之謀廉慎持身
輯軍民而閭閻不擾寬嚴馭下清壁壘而刁斗無驚威
信攸聞方隅以奠正資武略遽偃戎旗念舊酬勲特煥
絲綸之重易名賜卹益增泉壤之輝於戲馬鬣新封被
隆恩而昭國典龍章載錫申異數以勸臣忠期傳示於

後昆俾永垂於貞珉

開國佐運動臣武勳王揚古里直義公蜚英東弘

毅公額宜都碑 康熙三十九年

朕惟我國家創建不基開無疆之景運既篤生

神聖英武之君以剪除亂逆啟闢疆宇戡定諸邦一統之烈
肇於東土其時則有一德一心之佐殫忠戮力經營四
方以翊鴻猷而成大業蓋天實挺生異才鍾山嶽之靈
挾風霆之氣真誠不二毅勇無倫名高百戰之勳位超
五等之爵垂聲竹帛配食

廟廷以與國家共承休祉子孫世行其澤是豈偶然者哉當

我

列祖之龍興也一時人材蔚起猛士如雲戰將如雨以藝勇
稱以功名顯者不可勝數而功冠諸臣爲一代元勳則
有開國佐運忠勇王揚古里直義公蜚英東弘毅公額
宜都尤爲傑出焉朕嘗恭覽

列聖實錄考三臣行事折衝行間則戰必勝攻必克平居則
矢忠直贊謀畫豐功偉績至今焜耀簡編未嘗不細想
英風興懷往蹟昔人創造艱難枕戈擐甲櫛風沐雨之
勞恒留連往復不能去於懷也歲在戊寅朕巡行舊京
展祀

陵寢追維

祖宗功德隆盛并及當時佐命之臣邱隴所在皆遣官致祭而於三臣之墓特親至奠醊以示優崇仍復專官祭享蓋功在社稷以死勤事古人爰有明禋之典朕篤念勤庸用申異數併爲文勒諸貞石以昭示於無極焉

忠烈公佟養真碑

雍正元年

朕惟恭勤報國追卹宦隆忠勇傳家推恩自遠生則勤鞠躬於王事歿而綿世澤於後昆是宜寵綽載新貞珉永勒所以光昭世美優答前勞也爾佟養真乃舅舅隆可多之曾祖早預從龍夙勤汗馬臨陣而勇能摧敵勞

苦功高見危而奮不顧身舍生取義率長嗣以捐軀盡家兵而蹈刃

太祖高皇帝憫念英魂賞賚人戶完生平之節概耀簡策之聲華是以忠孝之門慶流奕葉勲賢之裔光啟三傳繁惟戚畹之榮實篤蓋臣之報朕用軫嘉遣烈特晉崇階追封爲一等公加贈太師諡曰忠烈嗚呼凜然生氣金石不磨卓矣家風淵源可溯尚其銘諸華碣表於幽阡用以垂賁堂封增重河嶽顧不偉歟

頌

聖祖仁皇帝御製

福陵頌 并序

惟

上帝鑒觀下民誕昇神聖俾立君極以開闢草昧垂統億祀非甚盛德曷克應天順人而締造鴻業焉我

太祖高皇帝聰明睿知本於性生英武勇略迥不世出故能躬著戎衣手提尺劍而疆宇日拓丕受景命顯庸東國騰威區夏雖太王之居岐翦商文王之江漢歸化未足方斯赫濯也予小子仰荷

列聖丕基統御萬國版章式廓隆古圖籍所莫覲矣然上跡聖祖當日一成一旅櫛沐風雨斬刈荆棘張彼撻伐順者綏之逆者殄之統壹羣部建元正位國始立焉既乃鞠旅徂征遐邇讐服悉臣悉氓遂定鼎遼土而王業愈光顯矣於戲盛哉惟

天生

聖惟

聖奉

天我

太祖創業之艱如彼而垂統之遠如此豈非天實授之而克荷厥休者哉予小子景仰謨烈奚敢忘紹述焉爰作頌曰於昭

太祖誕膺景命允武允文體協仁聖天罰恭行赫然割正啟
疆東海聿懷兆姓戰罔弗克威略如神德罔弗冒桀驚
咸臣受籙踐祚帝曆鼎新建官立制王路丕遵爰誓六
師濯征明國以少擊衆羣醜胥殛長驅鐵嶺墮彼阨塞
芒芒遼瀋隸我版域會極歸極乃建皇都大統肇跡炳
垂帝謨在昔湯文蹶起一隅先聖後聖同軌合符皇哉
龍興山川孔固
寢園崔嵬風雲盤互玉衣鐵馬百神衛護仰頌
先猷萬年錫祚
聖祖仁皇帝御製

昭陵頌

并序

國家至曆服無疆之休類必有神聖開天肇興王業又
必有神聖繼體式席鴻基故能經綸宇宙積功累仁保
世茲大我

太宗文皇帝挺濟哲之資蘊欽明之德紹膺寶位繼前謨而
光顯之外奮威武內修文教百度具舉臣民胥悅於是
南征則陸巖關繞明都耀兵燕趙瀚旅齊魯投鞭渤海
飲馬黃河六師安行莫我敢遏東征則誅貳綏服朝鮮
納款列爲屏藩西征則三十五部厥角歸命貢賚奉朔
蓋其允塞之猷桓撥之略赫濯於覆載間矣乃若惇九

族惠元元郊圻以飭爵秩以班賞善宥過優禮勲舊求
賢之思若沿崇儒之化不降雖古帝德廣運曷以加焉
當是時義問炳燦仁風翔洽一統之規已裕矣猶畫境
息民俟天休命於戲皇哉盛哉昔殷祥長發而湯受之
周室本文百世而文啟之若我

皇祖詎有遜美予小子嗣承丕緒撫安海寓以弘億萬禩之

業紹述

祖德敬揚

先烈迺作頌曰猗歟

皇祖克配彼

天光被四表仁池八埏既受共球神人攸主至治洋洋弘謨
訂訏桓哉七萃捷彼南疆匪疾匪棘兆人是匡徂征朝
鮮爰渡鴨綠聲其攜貳綏其臣屬西荒千帳慕義同歸
鐘鼓始振稽顙莫違至化覃敷函夏率育

天錫大寶景命有僕曰崇儒雅曰敘彝倫五章五用式迺俊
民法度孔昭典常聿正媲美唐虞惟后克聖建中錫極
詒我後昆皇皇大烈億祀彌尊肅望

山陵光華燁赫永言垂裕敬承靡斁

贊

至聖先師孔子贊

清濁有氣剛柔有質聖人參之人極以立行著習察含道莫由惟皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂旣窮象繫亦嚴筆削上紹往緒下示來型道不終晦秩然大經百家紛紜殊途異趣日月無踰堯堦可晤孔子之道惟中與庸此心此理千聖所同孔子之德仁義中正秉彝之好根本天性庶幾夙夜勗哉令圖溯源洙泗景躅唐虞載歷庭除式觀禮器濡毫仰贊心焉遐企百世而上以聖爲歸百世而下以聖爲師非師夫子惟師於道統天御世惟道爲寶泰山巖巖東海泱泱墻高萬仞夫子之堂孰窺其藩孰窺其徑道不遠人克念作聖

顏子贊

聖道早聞天資獨粹約禮博文不遷不貳一善服膺萬德來萃能化而齊其樂一致禮樂四代治法兼備用行舍藏王佐之器

曾子贊

洙泗之傳魯以得之一貫曰唯聖學在茲明德新民止善爲期格致誠正均平以推至德要道百行所基纂承統緒修明訓辭

子思子贊

於穆天命道之大原靜養動察庸德庸言以育萬物以贊乾坤九經三重大法是存篤恭慎獨成德之門卷之藏密擴之無垠

孟子贊

哲人既萎楊墨昌熾子輿闢之曰仁曰義性善獨聞知言養氣道稱堯舜學屏功利煌煌七篇竝垂六藝孔學攸傳禹功作配

文

祭告長白山文

朕惟國家受命凝庥則山川百神罔不協瑞矧溯興王之迹推翊運之祥尤宜肇舉明禋誕加顯號蓋自天作高山形於歌頌其來舊矣惟

神秀結東垂澤均厚載濬發三江之脈廣延千里之區極敷雲洩雨之奇宏濟物利民之用神山異蹟莫有與京仰緬

列祖龍興實基此地殊禎萃於盛世寶歷奠於萬年爰念靈符應申昭報朕茲博採彝章折衷禮制特封爲

長白山之神載諸祀典神其益彰英爽丕贊昌期尚歆時享於春秋永集鴻禧於

宗社專官告祭惟 神鑒知

祭告北鎮醫巫閭山文

維

神屹立營州魏凌華表飛泉瀉洞育物福民朕誕膺

天命祇荷神庥特遣專官用申殷薦惟 神鑒焉

祭告北鎮醫巫閭山文 康熙四十二年

維

神功障遼陽勢連渤海靈威丕赫作鎮北方朕祇承

休命統馭寰區夙夜勤勞殫思上理歷茲四十餘載今者適

屆五旬海宇昇平民生樂業見輿情之愛戴沛下土之

恩膏特遣專官虔申秩祀尚憑靈貺益錫蕃禧佑我國

家共登仁壽 神其鑒焉

祭遼太祖文 康熙二十一年

自古帝王受

天顯命繼道統而新治統聖賢代起先後一揆成功盛德炳

如日星朕誕膺

眷祐臨制萬方掃滅兇殘廓清區宇告功古后殷禮肇稱敬

遣專官代將牲帛爰修禋祀之誠用展景行之志仰企

明靈尚其 鑒享

御製訓飭士子文 康熙元年

國家建立學校原以興行教化作育人材典至渥也朕臨馭以來隆重師儒加意庠序近復慎簡學使釐剔弊端務期風教修明賢才蔚起庶幾樸樸作人之意乃比年士習未端儒效罕著雖因內外臣工奉行未盡善亦由爾諸生積錮已久猝難改易之故也茲特親製訓言再加警飭爾諸生其敬聽之從來學者先立品行次及文學學術事功源委有敘爾諸生幼聞庭訓長列宮牆朝夕誦讀寧無究心必也躬修實踐砥礪廉隅敦孝順以事親秉忠貞以立志窮經考業勿雜荒誕之談取友親師悉化儻盈之氣文章歸於醇雅毋事浮華軌度式

於規繩最防蕩軼子衿佻達自昔所譏苟行止有虧雖讀書何益若夫宅心弗淑行已多愆或蜚語流言脅制官長或隱糧包訟出入公門或唆撥姦猾欺孤凌弱或招呼朋類結社要盟乃如之人名教不容鄉黨弗齒縱倖脫褫朴濫竊章縫返之於衷能無媿乎况平鄉會科名乃掄才大典關係尤鉅士子果有真才實學何患困不逢年顧乃標榜虛名暗通聲氣夤緣詭遇罔顧身家又或改竄鄉貫希圖進取囂凌騰沸網利營私種種弊端深可痛恨且夫士子出身之始尤貴以正若茲厥初拜獻便已作姦犯科則異時敗檢踰閑何所不至又安

望其秉公持正爲國家宣猷樹績膺後先疏附之選哉
朕用嘉惠爾等故不禁反復惓惓頒茲訓言爾等務共
體朕心恪遵明訓一切痛加改省爭自濯磨積行勤學
以圖上進國家三年登造束帛弓旌不特爾身有榮卽
爾祖父亦增光寵矣逢時得志寧俟他求哉若仍視爲
具文玩愒勿倣毀方躍冶暴棄自甘則是爾等冥頑無
知終不能率教也旣負栽培復干咎戾王章具在朕亦
不能爲爾等寬矣自茲以往內而國學外而直省鄉校
凡學臣師長皆有司鐸之責者並宜傳集諸生多方董
勸以副朕懷否則職業弗修咎亦難追勿謂朕言之不

預也爾多士尚敬聽之哉

盛京通志卷之三

盛京通志卷之四

典謨

詩

聖祖仁皇帝東巡古今體詩 康熙二十一年

東巡二首 并序

八年征勦喜見澄平緬想

祖宗功德禮宜躬謁

陵廟以告成功爰於二月丁丑日命駕東巡是日天氣晴和
微風動旆從者溢路觀者夾途顧瞻遠邇莫不歡躍

賦詩二首

昆池不習戰寰宇已消兵鴻業承匪易虜功久乃成威
靈昭

祖德展謁奏羣情迢遞關山路寧辭千里行

其二

顛動因時豫東風引翠旗鳴鸞萬騎出執事百僚隨日
暖草初茁烟輕柳未絲春光無限好應有上

陵詩

山海關并序

連山據海地固金湯明時倚爲險要設重鎮以守之
我朝定鼎燕京垂四十年關門不閉旣非設險還慚

恃德偶賦敷言聊以紀事

重關稱第一扼險倚雄邊地勢長城接天空滄海連戍
歌終歲苦插羽不能傳作鎮隆三輔征輪困百年笳寒
龍塞月甲冷雉樓烟歷數歸皇極綱維秉化權漫勞嚴
鎖鑰空自結山川在德誠非易臨風更慨然

蒙恬所築長城

萬里經營到海涯紛紛調發逐浮誇當時用盡生民力
天下何曾屬爾家

姜女祠

朝朝海上望夫還畱得荒祠半仞山多少征人埋白骨

獨將大節說紅顏

曉過寧遠

孤城臨巨野舊烈憶西征破壘荆榛滿村雞向曉鳴

行殿夜覽章奏

飛遞傳來奏牘多旌門莫問夜如何銀燈毳帳春寒重
恐是陰陽尚未和

呂翁山是

聖祖

太宗文皇帝擒洪承疇處

旌旂直捲陣雲沈潦整遺蹤尚可尋十萬健兒皆解甲
一時大帥此成擒民情效順當年事王業維艱

聖祖心遂使關西如破竹至今戰氣晝陰森

松山

鳴笳伐鼓速兵機百勝謀成夜合圍月黑風高神鬼泣
金戈白馬識天威

杏山晚眺

野日荒荒蔓草平孤村雞犬寂無聲山中獵罷殘陽曉
時見高原夜燒明

懋小凌河

河水流不息晝夜去涓涓昔爲征戰地今是豫遊年駐
馬孤岑外移舟古岸前殘陽下新柳約畧見春妍

錦州道上

野徑臨官驛炊烟出杳冥地連榆塞紫山列錦屏青城
郭知何處旌旄只暫停版圖歸大業烽火罷林垆

駐蹕大凌河

結騎雲屯向晚過昇平笳吹動饒歌光搖幕火繁星燦
影暗旗風野霧多兵氣已銷沙石所軍聲猶壯大凌河
豐京老將還能說曾記前途自倒戈

途次逢寒食

何處來春風淡蕩開晴旭不見杏花紅纔逢柳梢綠

十三山

迤邐峯連大道間憑空青削十三山敵樓人散堠臺處
終古茸茸草色閒

過廣寧望醫巫閭山

名山插霄漢朶朶青芙蓉連亘數十里隱見千百重迢
遙不可極黛色堆奇峯窈窕復峯巒鬱鬱多蒼松中有
桃花洞杳靄常雲封萬古鎮幽州秩祀同岱宗盼望坐
引領瞻顧停六龍何時一登覽盪滌疏心胸

渡句驪河

野岸春蕪發青蔥一色齊皇輿連近遠地軸別東西日
送霓旌影風催駿馬蹄山河綿帶礪回首重低迷

過永安橋口占

夾路飛塵宿雨消十年曾此駐龍鑣春風城闕知非遠
幾處輕寒變柳條

盛京遣使請

太皇太后

皇太后起居夜書奏疏畢偶成

雲山遙隔萬安宮定省心懸午夜中孺慕經時書不盡
微誠憑仗與東風

三月初六日告祭

福陵恭述十韻

瑞靄鍾靈晴烟繞闕宮萬山皆拱北百水盡洄東天
矯盤峯秀紆迴磴道通俯看環象象遙睇極高崇松柏
丸丸直岡巒面面同恢弘思

祖烈建樹本神功戰術無前畧謀啟後衷揮蛇曾握劍定
鼎有遺弓展禮威儀整申誠俎豆豐車書叨繼統藐爾
媿微躬

初八日告祭

昭陵恭述十二韻

盛德兼三代威名定四方文謨真顯赫武烈實飛揚包
并收羣國虛謙集衆長網羅來俊彥締造闢洪荒卜世

周垂歷開基漢啟疆靈山佳氣迥

寢廟瑞雲張曠遠臨平陸幽探逼上蒼汗嘗趨石馬歌欲奏

芝房洱海銷兵戰炎陬絕叛狂功成昭默佑告祀肅誠
將微念通層構含情望兩相千官遵大典進退盡鏘鏘

盛京舊宮

雙懸鳳闕隱金鋪想見龍飛握瑞符殿列丹青崇大政
宮開紫極接神區君臣際會風雲日版籍留存山海圖
堂構有懷追往事土階儉樸示規模

告祀禮成宴諸臣於舊宮

閭闔門開玉座春金支遍插綺筵新鏗鏘劍珮千官集

曼衍魚龍百戲陳功定舞干歌靖亂恩留過沛樂同民
大風猛士何煩憶仗下班聯絳灌臣

三月十一日雪中詣

永陵告祭

峯巒疊疊水層層王氣氤氳護

永陵蟠伏諸山成虎踞飛鸞衆壑佐龍騰雲封草木橋闕古

雪擁松楸輦路升一自遷岐基盛業深思遺緒媿辭承

薩爾滸并序

太祖高皇帝嘗駐師於此以五百人破明四路兵數十萬衆

鐵杜松於鐵背山遂有遼東實

帝堦之所由基也

城成龍躍竦重霄黃鉞麾時早定遼鐵背山一名注前
耐戰龍橫行萬里迅飛騰

春蒐

講武乘時令戈戠訓甲兵雲梢催後騎天罽引前旌
甸軍容整新林羽衛行岐陽嚴示禮莫使廢春耕

柳條邊望月

雨過高天霽晚虹關山迢遞月明中春風寂寂吹楊柳
遙曳寒光度遠空

望祀長白山

名山鍾靈秀二水發真源翠靄籠天窟紅雲擁地根千
秋作兆啟一代典儀尊翹首瞻晴昊岩堯遍帝閭

松花江放船歌

松花江江水清夜來雨過春濤生浪花疊錦繡縠明綵
帆畫鷁隨風輕簫韶小奏中流鳴蒼巖翠壁兩岸橫浮
雲耀日何晶晶乘流直下蛟龍驚連檣接艦屯江城貌
貅健甲皆銳精旌旌映水翻朱纓我來問俗非觀兵松
花江江水清浩浩瀚瀚衝波行雲霞萬里開澄泓

江中雨望

烟雨連江勢最奇漫天霧黑影迷離掀翻波浪三千尺

疑是蛟龍出沒時

經葉赫廢城

斷壘生新草空城尚野花翠華今日幸谷口動鳴笳

鐵嶺

雨餘塞草自綠日出山花更紅轍跡神州近遠驥鳴廣

陌西東

雜詠

古戍行來日落孤村坐對月明漠漠龍沙千里桓桓虎

衛三更

巡幸遼陽

肅將軒駕向遼陽暖日晴薰百草芳照野山川皆動色
掀天旌旆自生光林間蒼蘚侵人徑城上新花綴女牆
欲問襄平舊郭郭千年華表鶴飛翔

駐蹕遼陽夜深對月用唐太宗遼城望月詩原韻

夜氣澄炎景清光度海碣流雲漸稀朗繁星聚如綴蟾
殿魄初明冰輪影未缺懷古聽行漏素心良蘊結曠然
望九霄妖氛盡殄滅

廣祐寺

禪宮多歲月瑞塔積風烟翡翠苔碑暗珠璣寶相傳馴
簷來紫鶴湧地出青蓮微雨輕埃洗茲晨興獨偏寺創於唐

時中有自來佛像

入千山

曉入千山路烟光織翠蘿崎嶇緣石磴宛轉歷巖阿樹
抄朱旗出藤陰玉勒過物華看亦好景色愛清和

祖樾寺

青山橫古寺羽旆陟層巔地僻茅堂小橋危石徑穿夏
條舍嫩葉春草發餘妍寂寞空林午時聞鐘磬傳

龍泉寺

狹徑纒容騎香臺欲起龍懸崖千仞落斷碣百年封泉
細通幽壑庭深暗古松臨高一騁望積翠靄重重

聖祖仁皇帝東巡古今體詩

康熙二十七年

八鳥喇境

蒼山岌業路綿延野燒荒原起夕烟幾點塞鴉宿枯樹
半灣流水傍行旃

松花江網魚最多頒賜從臣

松花江水深千尺振柁移舟網親擲溜河水急浪花翻
一手提網任所適須臾收處激頽波兩岸奔趨人絡繹
小魚沉網大魚躍紫鬣銀鱗萬千百更有巨尾壓船頭
載以牛車輪欲折水寒冰結味益佳遠笑江南誇魴鯽
徧令頒賜扈從臣幕下燃薪遞烹炙天下才俊散四方

網羅咸使登巖窟爾等觸物思比託捕魚勿謂情之常

泛松花江

源分長白波流迅支合烏江水勢雄木落霜空天氣肅
旌麾過處映飛虹

閱烏稽 并序

古松林數十里蔭翳無際非亭午夜分不見日月
松林黯黯百十里罕境偏為麋鹿遊雨雪飄蕭難到地
啼烏野草自春秋

駐驂烏喇之船廠憶壬戌春夏巡行此地每五日

一奏請

聖祖母太皇太后安今不可得矣書志慨慕

會問

慈寧草奏箋夜張銀燭大江邊重來往事俄追憶轉眼光

陰十七年

烏喇山嶼間古木灌莽澤潦徧野卽黃龍府之地

也今人未暇詳考賦詩二首

層岡翳蒼亂高低駿馬迎風不住嘶磧裏草深行潦濶
遲回應惜錦障泥

其二

路轉山環雜古柯覆茅苫舍傍坡陀疆隅湮沒遼金界

虎穴鷹巢處處多

行圍所經灰發葉赫哈達諸地皆我

和宋之所開并遺跡存焉賦詩二首

鐵馬金戈百戰時戎衣辛苦首開基榻邊鼙睡聲先定
始布中原一著棋

其二

垣鼎遺址尚山坳畧地平城闕土茅盪滌塵沙真不易
仰思遺烈駐雲旂

與京

靄靄與王地風雲莫可攀滌汨千曲水盤壘百重山瞻

拜謁

陵園肅凝思大業艱龍蔥松柏茂瑞鳥滿林間

駐蹕奉天府

四海爲家日鳴鑾過舊京新營安可並若水事時并城
市風猶古絃歌化漸行巍峩城闕在往歲幾經營

渡遼河

雪霽寒流已合冰雁行飛處曉天澄初冬欲盡歸程疾
回首烟光望

二陵

廣寧道中

漠漠寒雲色
戍樓終日間
鷺鳥號曉月
路出十一山
所過松山杏山大凌河皆

聖祖用武之地有迹

松杏山頭野草黃
朔風凄緊下前岡
雲屯虎旅新行在
地著龍興舊戰場
壁壘尋來餘氣色
田疇耕處拾刀鎗
恢弘

聖緒存遺跡東海洋洋

祖德長

御賜寧古塔將軍巴海詩 并序

鎮守寧古塔等處將軍巴海豐沛舊臣疆場重寄宗

威布德招徠遠人朕甚嘉焉爰賜篇章以旌乃績
夙簡威名將畧雄高牙坐鎮海雲東旌麾到處銷兵氣
壁壘開時壯武功盡使版圖歸化日遠教邊徼被皇風
酬勲世錫丹書重勉爾長思報國忠

刪書斷自唐虞帝典王謨如日月之麗天江河之行
地矣考政者見傳心之要窮經者資稽古之功豈僅
語言文字云爾哉我

朝

列祖肇興覃敷文教

詔勅誥諭吐辭爲經遠軼商用尚追姚姒今

皇上聰明睿智文武聖神凡致

天法

祖勤政愛民之事一皆本於至誠

綸綍所頒胥歸體要準古今而盡善合先後以同厥恭錄
天章載登卷首尊

列聖之寶訓播

皇極之敷言

修志者每卷之前引以小序舊例也今首典謨志置
序於後者先民有言無所書而不尊于命謹臣禮也

盛京通志卷之四

